

# Vun driweriwer

erscheint auf [www.lenauheim.de](http://www.lenauheim.de)

monatliche  
Erscheinung

August 2018

von Helen Alba

## Die „Vinga“-Erinnerung

Wer erinnert sich nit gheere an de „Vinga“-Tschokoladi? Mer hat de in weiss-grieni Schachtle kaafe kenne, drin ware zehn rundi Sticker, inewenzich han se weissi Füllung ghat un ware mit Tschokoladi bezoo. Gar mancher tät heit gheere dervun esse, doch die Gaumefreed is abkumm!

Die beriemti Tschokoladifabrik in der Ortschaft Vinga im Kreis Arad hat im Jahr 1885 de erschte Vinga-Tschokoladi hergstellt. Selmols wars zwar nor e Werkstatt, die der Familie Draskovits gheert hat. Johrelang is Vinga-Tschokoladi uf Japan, Deutschland un sogar Amerika exportiert wore. Es werd gsaat, dass Vinga-Tschokoladi so gut war, dass in dem Moment jemand e Stick dervun ins Maul gstoppt hat, em ganz eenfach de Hunger vergang is. Die Hersteller han die Zutate geheim ghal, es war uf jede Fall e Spezialrezept un wer mol dervun verkoscht hat, is sicherlich Vinga-abhängich gin!

Nor wenich Leit gits noch in Vinga, die dervun verzähle kenne, wie des vor villi Johre war. Die Familie Cociuba bsitzt e Sammlung vun leeri Vinga-Schachtle un Bilder. Die Familie Draskovits soll serwischer Abstammung gewenn sin un ihre Fabrik hat mol meh wie 100 Angstellti ghat. Außer Tschokoladi is Geleezucker, Bombons un Fondant hergstellt wore.

In Internet steht zu lese: „Die Ortschaft Vinga is nit nor mit ihrer scheeni Kerch beriehm gin, sondern ach mitm Vinga-Tschokoladi. Der is vor langer, langer Zeit in Arad, wu de Wiener Express Halt gemacht hat, de Fahrgäscht zum Verkoschte anbot wore“.

## Glas- oder Plastikflasche?

Doneilich hat mich e Bekannte aus Johrmark angeruft un gfroot, ob ich nit weeiß, wu mer in dem Temeschwar Lippaer Mineralwasser in Glasflasche kaafe kann. Er hat gheert, dass es irgendwu am Trajansplatz e Großhandl gibt, wu mer Getränke nor in Glasflasche zu kaafe kriet. Es sei doch vill gsinder, es Wasser nit aus dem Plastik zu trinke. Er tät halt vun Johrmark gfahr kumme un sich phaar Kische kaafe, die er dann, wann die Flasche leer sin, wieder mit volle umtausche tät. Alles Suche rund ums Trajansplatz hat nix gebrung. Doch sin die Erinnerunge an frieher ufgetaucht.

Wie ich uf Temeschwar kumm sin, des war 1964, un noch gudi Johre dernoh, hat mer jo nit nor Mineralwasser in Glasflasche kaafe kenne. Es Eel, de Essich ware jo ach in Glasflasche in de Stellasche vun dene domolichi Alimentaras. Un mer hat schleppe misse bis hem, weil Glas jo schwerer is wie Plastik. Un die leere Flasche, awer ach Dunschtgläser, hat mer dann an gewissi Sammelstelle wieder verkaafe kenne. Was ment der, was des e Gfrett war, bis die Eelflasche sauwer ware. Nit nor inewenzich mitm Flaschewäscher. Nee ach aussewenzich hat mer schrubbe misse, bis die Etiketten losgang sin. Manchmol han ich die Flasche oder Gläser in eem große Weidling in warmem Wasser ingewaicht, weil wann die Etiketten drufgepickt sin wore in de Fabrike is an Klebstoff iwerhaupt nit gspart gin.

Die Milch un de Joghurt hat mer natierlich ach in Glasflasche oder –gläser kaafe kenne. Mir is mit de leere Flasche gang un mit de volle zruckkumm. Un heizutach geht mehr mitm leere Zecker, fillt de mit Plastik- un Kartonbehältre, alles muss mer wanns leer is sortiere un entsorche. Mir han eemol die leere Wasserflasche (Plastik) gsammelt un sin mit zwaa gstuppte Zeckre voll zu so eem Automat (der war awer weit weg vun unsrer Wohnung), han an die 25 Flasche dorte ningstoch. Un wie de Zetl rauskumm is, ware mer um 80 Bani reicher! Do weeiß mer schun nimmi, wie mers am Beschte mache soll!